

Umsiki wengqephu osemncane ethubeni lomfundaze kaR40 000

CHARLES KHUZWAYO

INTOKAZI yaseMlazi, uBusisiwe Memela, isebenzisa ingqephu ukudingida kabanzi ngempilo yabantu abamnyama. Leli ciko elaphothula uGrade 12 eGrosvenor High, eBluff eThekwini lithi langena kulo mkhakha ngoba lalihlale linemibuzo ngendlela abantu abaziphatha ngayo.

“Eyami ingqephu ixoxa ngendlela umphakathi ophila ngayo. Bengihlale ngizibuza ukuthi kungani kunabantu abagqoka amateki, kungani abanye odadewethu befaka izinkophe. Bengingaqondi kodwa ngingazi ukuthi le mibuzo ngingayisho kanjani ngendlela enobuciko phakathi.

“Ngabe sengibona kungcono ngisebenzise ubuciko bokusika ingqephu ukuze ngikwazi ukubuzela le mibuzo futhi ngixoxe kabanzi ngomlando wengqephu yakithi. Empeleni ngigqugquzelwe nangamasiko akulegi,” kuchaza uSiwe (21) owaphothula iziqu ze-Fashion Design eDurban University of Technology (DUT) eThekwini.

Njengamanje umatasatasa wenza iziqu ze-B Tech. USiwe



UBUSISIWE “Siwe” Memela ongase azihlomulele ngomfundaze ka-R40 000 ngoMsombuluko

ungomunye wabafundi bakulesi sikhungo semfundo ephakeme abadlana imilala kumfundaze ka-R40 000.

Kule Emma Smith Scholarship uSiwe utholene phezu noJeandre Venter (Fashion Design), Mhlonishwa Chiliza (Fine Art), Karla Nixon (Fine Art), Li Joshua (Graphic Design), Jacques Hoffman (Graphic Design), Angela Sagar (Interior Design), Kelsey Sutton (Interior Design), Glenn Adendorff (Jewellery Design), Songezo Baleni (Jewellery Design), Jared Hinde (Video Technology), Luke Mason

(Video Technology). Odle umhlanganiselo uzomenyezelwa eDUT City Campus (Arthur Smith Hall) ngoMsombuluko ngo-6 ebusuku.

Imisebenzi yala maciko izokhonjiswa e-DUT City Campus Interior Design Department (Room 24). Lo mklomelo wasungulwa nguSir Charles Smith ngo-1920 kodwa wawetha ngonina u-Emma. Asebeke bahlabana ngalo mfundaze ngo-Elsie Currie, Dion Chang, Angela Buckland, Ledelle Moe noDeanne Donaldson.